

Na osnovu člana 16. stav (1) Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj 7/10 i 3/23) i člana 28. stav (3) Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj 15/24), na prijedlog Ministarstva za boračka pitanja, Vlada Zeničko-dobojskog kantona, na 63. sjednici, održanoj dana 27.12.2024. godine, d o n o s i

U R E D B U

O POMOĆI U RJEŠAVANJU STAMBENOG PITANJA BRANILACA I ČLANOVA NJIHOVIH PORODICA

DIO PRVI - OPĆE ODREDBE

Član 1.

(Predmet Uredbe)

Ovom Uredbom utvrđuju se uslovi, način i postupak ostvarivanja prava na pomoć u rješavanju stambenog pitanja branilaca i članova njihovih porodica koji imaju prebivalište i rješavaju stambeno pitanje na području Zeničko-dobojskog kantona (u daljnjem tekstu: Kanton), kao i povratnika u entitet Republiku Srpsku i raseljenih lica koji ostvaruju osnovna prava iz branilačko-invalidske zaštite u gradovima/općinama Kantona i koji su na evidenciji nadležnog organa za vojne evidencije u gradovima/općinama Kantona.

Član 2.

(Korisnici prava)

Korisnici prava po ovoj Uredbi su:

- a) dobitnik ratnog priznanja i odlikovanja;
- b) ratni vojni invalid;
- c) demobilizirani branilac koji je u periodu od 06.04.1992. do 23.12.1995.godine u sastavu Oružanih snaga proveo najmanje 24 mjeseca odnosno 12 mjeseci, ukoliko je u OS pristupio kao maloljetno lice ili šest mjeseci po punoljetstvu;
- d) član porodice šehida, poginulih, umrlih i nestalih branilaca-korisnik porodične invalidnine;
- e) član uže porodice umrlog dobitnika ratnog priznanja i odlikovanja-korisnik mjesečnog novčanog dodatka;
- f) član uže porodice umrlog ratnog vojnog invalida-korisnik porodične invalidnine i
- g) član uže porodice umrlog demobiliziranog branioca koji je u periodu od 06.04.1992. do 23.12.1995.godine u sastavu Oružanih snaga proveo najmanje 24 mjeseca odnosno 12 mjeseci, ukoliko je u OS pristupio kao maloljetno lice ili šest mjeseci po punoljetstvu – supružnik (koji je sa istim živio u braku najmanje dvije posljednje godine dana prije smrti, i da nije stupio u brak ili vanbračnu zajednicu) i dijete dok je na redovnom školovanju.

Član 3.

(Posebni korisnici)

Prava po ovoj Uredbi kao poseban korisnik može ostvariti i dijete šehida, poginulog, umrlog i nestalog branioca nakon prestanka prava na porodičnu invalidninu i dijete umrlog dobitnika ratnog priznanja ili odlikovanja, kojem je prestalo pravo na mjesečni novčani dodatak.

Član 4.

(Uslovi)

- (1) Pravo na pomoć u stambenom zbrinjavanju ostvaruje se pod uslovom da:

- a) imaju prebivalište na području Kantona u trajanju od najmanje tri godine neprekidno do dana podnošenja zahtjeva, osim povratnika u entitet Republiku Srpsku;
 - b) nemaju riješeno stambeno pitanje na području Bosne i Hercegovine, izuzev za pravo iz člana 6. stav (1) tačka 3) ove Uredbe;
 - c) posjeduju valjanu dokumentaciju za odobravanje pomoći iz člana 6. ove Uredbe;
 - d) nisu bili korisnici nepovratnih sredstava Federalnog, Kantonalnog ili gradskog/općinskog budžeta, donatorskih sredstava i ostalih sredstava dodjeljenih u svrhu stambenog zbrinjavanja u iznosu većem od 7.000,00 KM.
 - e) nisu izvršili zamjenu, prodaju ili poklon stambenog objekta u ličnom ili vlasništvu članova zajedničkog domaćinstva;
 - f) oni i članovi njihovog zajedničkog domaćinstva nisu vlasnici ili suvlasnici subjekta koji obavlja privrednu ili drugu djelatnost, registriranog kao privredno društvo;
 - g) da ukupna primanja zajedničkog domaćinstva ne prelaze iznos dvije prosječne neto plaće isplaćene u Federaciji Bosne i Hercegovine u prethodnoj kalendarskoj godini, prema podacima Zavoda za statistiku Federacije Bosne i Hercegovine, izuzev lica iz člana 2. tačka a) i d) i ratnog vojnog invalida sa procentom invalidnosti 70% i više.
- (2) U smislu ove Uredbe smatra se da je stambeno zbrinuto lice koje u ličnom vlasništvu ili posjedu, vlasništvu ili posjedu bračnog druga ili bilo kojeg člana zajedničkog domaćinstva, posjeduje stambeni objekat sa minimalnim uslovima stanovanja.
- (3) Pod minimalnim uslovima stanovanja u smislu stava (2) ovog člana smatra se opremljen prostor namijenjen za stanovanje (soba, kuhinja, kupaoonica, hodnik) u kojem boravi porodica odnosno domaćinstvo.
- (4) Ukoliko se ukaže potreba, komisija Ministarstva će u pojedinim slučajevima cijeliti postojanje uslova iz stava (3) ovog člana izlaskom na teren.

Član 5.

(Dokazivanje statusa)

U postupku ostvarivanja prava, branioci i članovi njihovih porodica svoj status dokazuju rješenjem nadležne gradske/općinske službe o priznavanju svojstva dobitnika ratnog priznanja i odlikovanja i ratnog vojnog invalida, odnosno člana porodice šehida, poginulog, umrlog, nestalog branioca i člana uže porodice poginulog, umrlog ili nestalog dobitnika ratnog priznanja i odlikovanja, ili uvjerenjem nadležnog organa izdatog u skladu sa Zakonom o upravnom postupku ("Službene novine F BiH" broj 2/98, 48/99 i 61/22), a demobilizirani branilac uvjerenjem VFMB-3a izdatog od strane nadležne Grupe za pitanja evidencija iz oblasti vojne obaveze.

Član 6.

(Način rješavanja stambenog pitanja)

- (1) Pomoć u rješavanju stambenog pitanja branilaca i članova njihovih porodica vrši se dodjelom jednokratnih bespovratnih novčanih sredstava u svrhu:
- a) izgradnje stambenog objekta s ciljem trajnog stambenog rješavanja;
 - b) kupovine individualnog stambenog objekta ili stana na osnovu ugovora zaključenog u prethodnoj ili tekućoj kalendarskoj godini;
 - c) prilagođavanja stambenog objekta posebnim potrebama ratnih vojnih invalida sa utvrđenim procentom invalidnosti 70% V grupe i više, a što će komisija iz člana 13. stav (2) Uredbe cijeliti po pojedinačnim zahtjevima;
 - d) sufinansiranja izdavanja dozvole za gradnju ili legalizaciju stambenog objekta po rješenjima i računima iz prethodne i tekuće godine;

- e) sufinansiranje troškova priključka na infrastrukturne mreže (voda i kanalizacija, električna energija, gas) na osnovu saglasnosti ovlaštenog organa i računa iz prethodne i tekuće kalendarske godine.
- (2) Izuzetno, u skladu sa raspoloživim budžetskim sredstvima, pomoć u svrhu sanacije i adaptacije stambenih jedinica može se ostvariti putem javnog poziva objavljenog u skladu sa programom koji na prijedlog Ministarstva donosi Vlada Kantona.
- (3) Programom iz stava (2) ovog člana propisat će se uslovi, način i postupak ostvarivanja prava na pomoć u svrhu sanacije i adaptacije stambenih jedinica.

Član 7.

(Prioriteti u stambenom zbrinjavanju)

Rješavanje stambenog pitanja branilaca i članova njihovih porodica vrši se po pravu prvenstva kako slijedi:

- a) dobitnici ratnih priznanja ili odlikovanja iz člana 5. stav (6) Zakona o posebnim pravima dobitnika ratnih priznanja i odlikovanja i članova njihovih porodica (Službene novine FBiH broj: 70/05, 61/06, 9/10, 90/17, 29/22 i 60/24);
- b) djeca šehida, poginulih, umrlih, nestalih branilaca bez oba roditelja i ratni vojni invalidi sa oštećenjem organizma od 100% I grupe;
- c) porodice sa dva i više šehida, poginulih, umrlih, nestalih branilaca i ratni vojni invalidi sa oštećenjem organizma od 100% II grupe;
- d) članovi uže porodice poginulih, umrlih ili nestalih dobitnika ratnih priznanja ili odlikovanja iz člana 5. stav (6) Zakona o posebnim pravima dobitnika ratnih priznanja i odlikovanja i članova njihovih porodica;
- e) porodice šehida, poginulih, umrlih, nestalih branilaca i ratni vojni invalidi sa oštećenjem organizma od 90%, 80% i 70%;
- f) članovi uže porodice poginulih, umrlih ili nestalih dobitnika ratnih priznanja ili odlikovanja iz člana 5. stavovi (7) i (8) Zakona o posebnim pravima dobitnika ratnih priznanja i odlikovanja i članova njihovih porodica i umrlih ratnih vojnih invalida;
- g) ostali dobitnici ratnih priznanja ili odlikovanja;
- h) ratni vojni invalidi sa oštećenjem organizma od 20% do 60%;
- i) demobilizirani branioci iz člana 2. tačka c) ove Uredbe;
- j) član uže porodice umrlog demobiliziranog branioca– supružnik i dijete iz člana 2. tačka g) ove Uredbe.

DIO DRUGI - POSTUPAK DODJELE NOVČANIH SREDSTAVA

Član 8.

(Visina sredstava novčane pomoći)

- (1) U svrhu pomoći u rješavanju stambenog pitanja, braniocima i članovima njihovih porodica po pojedinačnim zahtjevima mogu biti odobrena novčana sredstva u maksimalnom iznosu do 50.000,00 KM.
- (2) Izuzetno od odredbe stava (1) ovog člana, Vlada Kantona, na obrazloženi prijedlog Ministarstva, može odobriti sredstva u većem iznosu za potrebe stambenog zbrinjavanja RVI 100% I grupe.
- (3) Po pojedinačnom zahtjevu podnesenom u skladu sa članom 6. stav (1) tačka e) Uredbe mogu biti odobrena sredstva do iznosa 1.500,00 KM po jednom priključku.

Član 9.
(Podnošenje zahtjeva)

- (1) Pravo na novčanu pomoć po ovoj Uredbi može se ostvariti podnošenjem zahtjeva gradskoj/općinskoj službi nadležnoj za poslove branilačko-invalidske zaštite u gradu/općini u kojoj podnosilac zahtjeva ima prebivalište, odnosno u kojoj ostvaruje prava iz branilačko-invalidske zaštite ili u kojoj se nalazi na evidenciji nadležnog organa za vojne poslove (u daljnjem tekstu: gradska/općinska služba).
- (2) Zahtjev za ostvarivanje prava na pomoć u rješavanju stambenog pitanja branilaca i članova njihovih porodica, može se podnijeti od usvajanja Budžeta Kantona do 30.11. tekuće kalendarske godine, a po obavijesti Ministarstva.

Član 10.
(Obrazac zahtjeva)

Zahtjev za novčanu pomoć u svrhu stambenog zbrinjavanja podnosi se na posebnim obrascima koje propisuje ministar Ministarstva u roku od sedam dana od dana stupanja na snagu ove Uredbe.

Član 11.
(Potrebna dokumentacija)

Uz zahtjev za dodjelu sredstava za stambeno zbrinjavanje zainteresovani kandidati prilažu, u originalu ili ovjerenoj kopiji sljedeću dokumentaciju:

- a) dokaz o statusu branioca i člana porodice branioca;
- b) rješenje o starateljstvu nad malodobnom djecom bez oba roditelja;
- c) dokaz o provedenoj ostavinskoj raspravi na pokretnoj i nepokretnoj imovini za porodice šehida/poginulih branilaca, poginulih, umrlih ili nestalih dobitnika ratnih priznanja ili odlikovanja, umrlih ratnih vojnih invalida i umrlih demobiliziranih branilaca;
- d) uvjerenje o kretanju (kao dokaz o prebivalištu);
- e) dokaz o radnopravnom statusu i visini prihoda podnosioca zahtjeva i punoljetnih članova zajedničkog domaćinstva:
 - 1) dokaz o prihodima zaposlenih – uvjerenje o prosječnoj plaći u posljednja tri mjeseca prije podnošenja zahtjeva, a kod vlasnika samostalne djelatnosti-Specifikacija za utvrđivanje dohotka od samostalne djelatnosti - obrazac SPR 1053 (koji se podnosi uz Godišnju poreznu prijavu/Godišnju prijavu dohotka) za prethodnu kalendarsku godinu, a u slučaju da samostalna djelatnost posluje manje od godinu dana dostavlja se potvrda ovlaštenog knjigovođe,
 - 2) u slučaju nezaposlenosti - uvjerenje nadležne Porezne ispostave o statusu osiguranika, odnosno da se isti ne vodi u jedinstvenom sistemu uplate doprinosa,
- f) ovjerenu izjavu o ukupnim prihodima zajedničkog domaćinstva;
- g) uvjerenje nadležne Porezne uprave - Porezne ispostave kao dokaz da oni i članovi njihovog porodičnog domaćinstva nisu vlasnici ili suvlasnici subjekta koji obavljaju privrednu ili drugu djelatnost, registrovanog kao privredno društvo;
- h) uvjerenje nadležnog gradskog/općinskog organa da nisu bili korisnici nepovratnih sredstava Federalnog, Kantonalnog ili gradskog/općinskog budžeta dodijeljenih u svrhu stambenog zbrinjavanja u iznosu većem od 7.000,00 KM;
- i) ovjerena izjava da nisu izvršili zamjenu, prodaju ili poklon stambenog objekta u ličnom ili vlasništvu članova zajedničkog domaćinstva;

- j) ovjerena izjava o zajedničkom domaćinstvu (kućna lista);
- k) u slučaju da zahtjev podnosi udovica umrlog demobiliziranog branioaca - uvjerenje o bračnom stanju;
- l) dokaz o vlasništvu i posjedu stambenog objekta podnosioca zahtjeva i punoljetnih članova zajedničkog domaćinstva:
 - 1) potvrda o vlasništvu nadležnog zemljišnoknjižnog ureda iz svih gradova/općina prebivališta sa svim prikazanim zemljišnoknjižnim ulošcima,
 - 2) uvjerenje o imovini nadležnog katastra iz svih gradova/općina prebivališta sa svim prikazanim posjedovnim listovima,
- m) u slučaju gradnje stambenog objekta: građevinska dozvola ili lokacijska informacija za objekte čija građevinska bruto razvijena površina nije veća od 200 m²;
- n) u slučaju kupovine stambenog objekta: kupoprodajni ugovor o kupovini stambenog objekta uz priložen zemljišno-knjižni izvadak prodavca ili dokaz da je podnesen zahtjev za uknjižbu od strane kupca, Rješenje nadležne Poreske ispostave o plaćanju ili oslobađanju plaćanja poreza na promet nekretnina kao dokaz da prvi put rješava stambeno pitanje;
- o) u slučaju prilagođavanja stambenog objekta posebnim potrebama ratnih vojnih invalida sa utvrđenim procentom invalidnosti 70% V grupe i više: predračun ili račun građevinskih radova i materijala ovlaštenog privrednog subjekta registrovanog za građevinske radove ili ovlaštenog stručnog lica;
- p) u slučaju sufinansiranja izdavanja dozvole za gradnju ili legalizaciju stambenog objekta: rješenje nadležnog organa grada/općine o dozvoli za gradnju ili legalizaciju stambenog objekta iz prethodne i tekuće godine sa priloženim dokazima o troškovima u postupku izdavanja (računi, uplatnice, potvrda nadležnog organa o izvršenim uplatama ili sl.);
- r) u slučaju sufinansiranja priključka na infrastrukturne mreže (voda i kanalizacija, električna energija, gas):
 - 1) odgovarajuća saglasnost za priključak na infrastrukturnu mrežu izdatu od ovlaštenog organa, odnosno pravnog lica i račun o troškovima priključka iz prethodne ili tekuće kalendarske godine izdat na ime podnosioca zahtjeva;
 - 2) izuzetno ukoliko se radi o dovodu vode ili izgradnji kanalizacije (bunar, septička jama, ili sl.) korisnik prilaže potvrdu ovlaštenog organa kojom se potvrđuje da na toj lokaciji ne postoji niti se planira uspostaviti vodovodna ili kanalizaciona mreža, a opravdanost takvog zahtjeva će cijeliti komisija iz člana 13. stav (2) Uredbe;
- s) druge dokaze iz kojih se vidi opravdanost zahtjeva.

Član 12.

(Postupak po zahtjevu)

- (1) Gradska/općinska služba formira stručnu komisiju (u daljnjem tekstu: gradska/općinska komisija), od tri do pet članova, od kojih najmanje jedan član posjeduje zvanje građevinske struke.
- (2) Zadatak Komisije je da razmotri podneseni zahtjev, izvrši uvid u priloženu dokumentaciju te po potrebi traži dopunu iste, izvrši uvid u stanje objekta/stana na licu mjesta, sačini zapisnik o utvrđenom stanju, te uputi prijedlog o odbacivanju, odbijanju ili odobravanju zahtjeva koji treba da sadrži i visinu sredstava koja se predlažu.

Član 13.
(Rad Komisije Ministarstva)

- (1) Zahtjev sa prijedlogom komisije, na propisanom obrascu, gradska/općinska služba dostavlja Ministarstvu, u roku koji ne može biti duži od 15 dana od dana podnošenja zahtjeva.
- (2) Dostavljenu dokumentaciju razmatra petočlana komisija koju posebnim rješenjem imenuje ministar Ministarstva (u daljnjem tekstu: Komisija Ministarstva).
- (3) Zadatak Komisije Ministarstva je da razmotri dostavljeni prijedlog gradske/općinske službe, izvrši uvid u priloženu dokumentaciju i po potrebi istu provjeri, konstatuje ispravnost postupka, a u posebnim slučajevima izlaskom na teren utvrdi činjenično stanje, te zahtjeva pribavljanje i dostavljanje na uvid naknadno i druge dokumentacije za koju ocjeni da je od značaja za donošenje odluke o odobravanju sredstava.
- (4) Po okončanim aktivnostima iz stava (3) ovog člana, Komisija Ministarstva dostavlja ministru Ministarstva obrazložen stav o odbacivanju, odbijanju ili opravdanosti zahtjeva, sa prijedlogom o dodjeli novčane pomoći, usklađenim sa programom utroška sredstava Ministarstva.

Član 14.
(Odobrovanje sredstava)

- (1) Na osnovu prijedloga Komisije Ministarstva o dodjeli sredstava u pojedinačnim iznosima koji ne prelaze iznos od 5.000,00 KM, odlučuje ministar Ministarstva, koji istovremeno utvrđuje dinamiku isplate.
- (2) Na obrazloženi prijedlog Ministarstva, zaključak o odobravanju dodjele sredstava u iznosu većem od 5.000,00 KM donosi Vlada Kantona.

Član 15.
(Ograničenje u dodjeli pomoći)

Novčana pomoć po ovoj Uredbi može biti dodijeljena samo jednom kandidatu iz jednog zajedničkog domaćinstva.

Član 16.
(Izdavanje rješenja)

- (1) Na osnovu dostavljene obavijesti Ministarstva, gradska/općinska služba donosi rješenje o odobravanju pomoći, odbacivanju ili odbijanju zahtjeva.
- (2) O žalbi na rješenje gradske/općinske službe rješava Ministarstvo.

Član 17.
(Nerealizovani zahtjevi)

Svi nerealizovani podneseni zahtjevi koji ispunjavaju uslove iz ove Uredbe za dodjelu sredstava, bit će prioritarno rješavani u narednoj budžetskoj godini.

Član 18.
(Posebni slučajevi stambenog zbrinjavanja)

- (1) Sredstva za stambeno zbrinjavanje pripadnika branilačke populacije, po posebnim zahtjevima proslijeđenim od gradske/općinske službe, koji nisu definirani ovom Uredbom, na prijedlog Komisije Ministarstva i uz posebno obrazloženje ministra Ministarstva, zaključkom odobrava Vlada Kantona.

- (2) U skladu sa stavom (1) ovog člana, izuzetno se može odobriti pomoć za sanaciju i adaptaciju stambenog objekta podnosioca zahtjeva u slučaju da postojeće stanje stambenog objekta životno i egzistencijalno ugrožava podnosioca zahtjeva i članove njegovog domaćinstva.
- (3) Prvostepena komisija grada/općine ili komisija Ministarstva cijeni postojanje specifičnih, posebnih okolnosti sa aspekta: kompletnosti dokumentacije, dokaza o specifičnim okolnostima, zapisnika o izvršenom pregledu stambenog objekta sačinjenog od strane gradske/općinske komisije ili komisije Ministarstva, te drugih dokaza iz kojih se nesporno može utvrditi potreba za rješavanjem, odnosno da postojeće stanje stambenog objekta životno i egzistencijalno ugrožava podnosioca zahtjeva i članove njegovog domaćinstva.

Član 19.

(Stambeno zbrinjavanje povratnika u RS i raseljenih lica)

- (1) Branilac i član njegove porodice, koji je povratnik u entitet Republiku Srpsku ili ima status raseljenog lica, u svrhu osiguranja uslova za održivi povratak u mjesto u kojem je imalo prebivalište ili boravište prije početka agresije na Republiku Bosnu i Hercegovinu, može ostvariti pravo na jednokratnu dodjelu sredstava za stambeno zbrinjavanje, na način i u postupku propisanom ovom Uredbom za ostale branioce i članove njihovih porodica.
- (2) Pravo iz stava (1) ovog člana nema lice koje je na području Kantona riješilo svoje stambeno pitanje.

Član 20.

(Ugovor)

- (1) Sa kandidatima kojima je odobrena pomoć, ministar Ministarstva zaključuje ugovore o dodjeli i implementaciji sredstava za trajno stambeno zbrinjavanje i isplati istih, kojim se konkretno regulišu prava i obaveze ugovornih strana po ovom pitanju, izuzev za odobrenu pomoć iz člana 6. stav (1) tačka e) ove Uredbe.
- (2) O terminu potpisivanja ugovora kandidate obavještava gradska/općinska služba.

Član 21.

(Dostava i pravdanje sredstava)

- (1) O doznačenim sredstvima za isplatu novčane pomoći gradska/općinska služba obavještava korisnike i istim vrši isplatu putem tekućih računa.
- (2) Gradska/općinska služba je dužna Ministarstvu dostaviti pravdanje utrošenih sredstava, u roku od 15 dana po izvršenoj isplati.

DIO TREĆI - PRELAZNE I ZAVRŠNE ODREDBE

Član 22.

(Sredstva za ostvarivanje prava)

Sredstva za realizaciju prava branilaca i članova njihovih porodica po ovoj Uredbi, osiguravaju se u Budžetu Kantona u skladu sa prilivom sredstava.

Član 23.

(Evidencija i obrasci)

Elektronsku evidenciju o podnesenim zahtjevima i korisnicima prava po ovoj Uredbi vode gradske/općinske službe i Ministarstvo, po posebnim obrascima koje propisuje ministar Ministarstva u roku od sedam dana od dana stupanja na snagu ove Uredbe.

Član 24.
(Instrukcije i nadzor)

- (1) U realizaciji ove Uredbe Ministar može donijeti odgovarajuće instrukcije.
- (2) Nadzor nad provođenjem ove Uredbe vrši Ministarstvo.

Član 25.
(Ravnopravnost spolova)

Sve imenice koje se odnose na braniocima i članove njihovih porodica, upotrijebljene u ovoj Uredbi samo u muškom ili samo u ženskom rodu, odnose se na oba spola.

Član 26.
(Stavljanje Uredbe van snage)

Danom početka primjene ove Uredbe prestaje važiti Uredba o pomoći u rješavanju stambenog pitanja branilaca i članova njihovih porodica ("Službene novine Zeničko-dobojskog kantona" broj 4/14, 1/18, 15/21 i 18/22).

Član 27.
(Ranije započeti postupci)

Svi slučajevi odnosno postupci koji do dana stupanja na snagu ove Uredbe nisu pravosnažno okončani, završit će se po odredbama propisa koji je bio na snazi u vrijeme podnošenja zahtjeva.

Član 28.
(Prijelazne odredbe)

Dijete šehida, poginulog, umrlog i nestalog branioca nakon prestanka prava na porodičnu invalidninu i dijete umrlog dobitnika ratnog priznanja ili odlikovanja, kojem je prestalo pravo na mjesečni novčani dodatak mogu ostvariti pravo na pomoć u rješavanju stambenog pitanja po zahtjevima podnesenim u toku 2025. godine za prava iz člana 6. stav (1) tačka b), d) i 5) ove Uredbe na osnovu ugovora i saglasnosti iz perioda 2022. godine do 2025. godine.

Član 29.
(Stupanje na snagu i objavljivanje Uredbe)

Ova Uredba stupa na snagu osmog dana od dana objavljivanja u "Službenim novinama Zeničko-dobojskog kantona", a primjenjuje se od 01.01.2025. godine.

Broj: 02-02-21445/24
Datum, 27.12.2024. godine
Zenica

PREMIJER

Nezir Pivić

DOSTAVLJENO:

1x Ministarstvo za boračka pitanja,
1x "Službene novine Zeničko-dobojskog kantona",
1x a/a.